

Inatsisissatut siunnersuummut nassuiaatit**I Nalinginnaasumik nassuiaatit.**

Siunnersuutikkut allanngortinneqartut ukuupput:

1. § 2, imm. 3 aamma 4; nutaartaat; piniarnermi aallaaniarnermilu pissutsit pillugit siunnersuisarnermi piniartut atuisullu ilisimasaasa ilanngunneqarnissaat,
2. § 3; paragraffi nutaaq; oqariartaatsit oqaatsillu atorneqartut nassuiarneqarnerat,
3. § 4, imm. 3; nutaartaa; Inatsisileriffiup siunnersuuteqarneratigut inuussutissarsiutigalugu piniarnerup aallaaniarnerullu qanoq paasineqarnissaannik nassuiaat ikkunneqarpoq,
4. § 4, imm. 4; Europamiut Inuit Pisinnaatitaaffii pillugit Aalajangersagaat unioqqutikkumaganu allanngortitsisoqarpoq, taamaalilluni danskit naalagaaffianni innuttaasut aamma nunani allani innuttaasut akornanni naligiissitsisoqalersillugu. Immikkoortumi tassani sunngiffimmi piniarneq aallaaniarnerlu nassuiaaserniarneqarput.
5. § 4, imm. 6; inatsisikkut tunngavissaliisoqarpoq, tassa Naalakkersuisut inunnut sunngiffimmi piniarsinnaanermut allagartalinnut uumasunut killilersugaasumik piniakkanut allatullu malittarisassaqartitaasunut akuersissutit killilersorneqarnissaannik maleruagassaliorsinnaanngorlugit, taamaaliornissamut pissuteqavissumik immikkut isiginninnissamik pisariaqartitsisoqartillugu.
6. § 6, imm. 1, nr. 4); inatsisikkut tunngavissaliisoqarpoq, taamaalillutik Naalakkersuisut inuussutissarsiutigalugu sunngiffimmi aallaaniarnermut piniarneqarsinnaatitaasunik erseqqinnerusumik pisassiilluni aalajangersagaasunik agguaassinermi inoqutigiinnik aamma/imaluunniit ukioqqortussutsimik piumasaqaatinik atuisinnaanngortillugit.
7. § 6, imm. 1, nr. 7); inatsisikkut tunngavissaliisoqarpoq taamaalillutik Naalakkersuisut piniarnermut aallaaniarnermullu atatillugu imassanik aalajangersimasunik atueqqusinningsinnaallutik,
8. § 6, imm. 3; oqaasertai erseqqissarneqarput, taamaalillutik Naalakkersuisut nalunaarutini ataasiakkaani erseqqinnerusunik malittarisassiorsinnaallutik Naalakkersuisut § 6, imm. 1-imi killiliussaasa iluanni piniakkanik ataasiakkaanik kommunit annertunerusumik iluaquteqarniarnermik aqutsisinnaalernissaat siunertaralugu.
9. § 6, imm. 6; inatsisikkut tunngavissaliisoqarpoq, imaalillugu Naalakkersuisut piniarnermut allagartartaassagaanni piniarsinnaanermut misilitsittoqarnissaanik piumasaqaateqartoqarnissaanik maleruagassiorsinnaanngorlugit. Piniariaatsit sorliit piniarsinnaanermut misilitsissutaasassanersut nalunaarutikkut malittarisassiuunneqassapput,
10. Immikkoortut siuliini taaneqartut saniatigut ataasiakkaanik oqaasertaliussat iluarsiivigineqartarput.

1-imut) Maannakkut inatsisaasumi piniarnermi aallaaniarnermilu pissutsit pillugit siunnersuisarnermut tunngatillugu atuisut najukkanilu assigiinngitsuni najugallit ilisimasaasa ilanngunneqartarnissaat anguneqarsimanngilaq, taamaammat allannguutissatut siunnersuummi tamakku 1998-imi ukiakkut Inatsisartut katersuunneranni kiisalu 1998-imi ukiakkut pisuussutit uumassusillit pillugit isumasioqatigiinnermi siunnersuutigineqartututtaaqq innersuussutiginiarneqarlutik.

Taamatuttaaqq 1998-imi NAMMCO-p siunnersuisoqatigiivisa kingullermik ataatsimiinneranni kalaallit peqataatitaasa siunnersuutigaat akueritillugulu NAMMCO piniakkat pillugit siunnersuinnermini piniartut atuisullu ilisimasaat (qangaaniilli ilisimasat) inassuteqarnerminut ilaatittasagai.

2-mut) Siusinnerusukkut inatsimmi oqariartaatsit oqaatsillu atorneqartut qanoq paasineqarnissaannik nassuiaatit atorneqartarsimanngillat. Siunertarineqarpoq aalisarneq pillugu inatsimmi iliorsimanertulli oqaatsit oqariartaatsillu atorneqartut paasiuminarnerulissasut.

3-mut) § 4, imm. 3 nutaajuvoq, ikkunneqartoq inuussutissarsiutigalugu piniarnerup aallaaniarnerullu paasineqartarnerat Inatsisileriffimmit siunnersuutigineqartutut sinaakkusinerliarlugu.

4-mut) § 4, imm. 4: Inatsimmi maannakkut atuuttumi aalajangersagaqarpoq nunani allani innuttaasut aatsaat sunngiffimmi piniarnermut allagartartaarsinnaasut ukiuni marlunni malittuinnarni Kalaallit Nunaanni aalajangersimasumik najugaqareersimagunik. Inatsisileriffimmit tamanna nalilerneqarpoq danskit naalagaaffianni innuttaasunut Kalaallit Nunaanni aalajangersimasumik najugaqartunut naleqqiullugu nunani allani innuttaasut aalajangersimasumik najugaqartut allaanerusumik pineqartut, Europamiut Inuit Pisinnaatitaaffii pillugit Aalajangersagaanut akerliusumik. Aalajangersagaq allanngortinneqassaaq imaalillugu inuit Kalaallit Nunaanni aalajangersimasumik najugaqartut assigiinngitsumik pineqartussaajunnarlugit.

5+6-imut) § 4, imm. 6 kiisalu § 6, imm. 1 nr. 4) Aalajangersakkat taakku ikkunneqarput Naalakkersuisut piniakkanut killilersugaasunut, tamanna pissuteqavissumik immikkut isiginninnissamik pisariaqartitsisoqartillugu, inoqutigiinnut imaluunniit ukiutigut killiliussanut imaluunniit inunnut sunngiffimmi piniarnermut allagartalinnut suli annertunerusunik killiliiniarlutik aalajangersaasinnaanissaannut inatsisikkut tunngavissinniarlugit. Assersuutigalugu piniagassat ikittuinnasut soorlu tuttut umimmaallu inunnut aalajangersimasunut agguanneqartarneranni piniarnermik inuussutissarsiuteqartut kiisalu kulturikkut qasuersaartarnikkullu pisariaqartitat eqqarsaatigalugit.

Allanngortitsineq taanna 1998-imi Inatsisartut ukiakkut katersuunneranni aamma 1998-imi ukiakkut pisuussutit uumassusillit pillugit isumasioqatigiinnermi oqallinnermi kissaatigisaasunut naapertuuppoq.

7-imut) § 6, imm. 1, nr. 7) ikkunneqarpoq, taamaalillutik Naalakkersuisut piniarnermut aallaaniarnermullu atatillugu imassat ilusaat aalajangersimasut atoqqunngissinnaallugit.

8-mut) Aalajangersagaq taanna maleruagassanut atuuttumut erseqqissaataavoq, taamaalilluni kommunit ataasiakkaat imaluunniit kommunit arlallit kommunip ileqqoreqqusaatigut erseqqinnerusunik maleruagassaliorsinnaallutik najukkami pisariaqartitanut naapertuuttunik. Aalajangersagaq taanna erseqqinnerulersinneqarpoq inatsisartunut ilaasortanit ataasiakkaanit aamma kommuninit ataasiakkaanit kiisalu pisuussutit uumassusillit pillugit isumasioqatigiinnermi siuliini taaneqartumi oqallinnerni kissaatigisat akuerineqarnissaat siunertaralugu.

9-mut) Inatsimmi atuuttumi piniarnermut allagartartaarnissamut piumasaqaatit aallaaniarsinaanermut misilitsittoqartarnissaanik aalajangersaanissamut tunngavissaqanngilaq. Taamaammat inatsisikkut tunngavissiisoqarpoq, taamaalillutik Naalakkersuisut tamanna pillugu erseqqinnerusunik aalajangersagaliorsinnaanngortillugit. Allannngortitsineq taanna maannakkut naalakkersuisooqatigiit siunertaannut kiisalu pisuussutit uumassusillit pillugit isumasioqatigiinnermi siuliini taaneqartumi oqallinnermut naapertuuppoq.

Inatsisip allannngortinneqarnissaanik siunnersuut kommuninut ataasiakkaanut, KANUKOKA-mut, KNAPK-mut, TPAK-mut kiisalu pisorta qarfinnut attuumassuteqartunut tusarniaassutigineqareerpoq. KANUKOKA inatsisissatut siunnersuummut oqaaseqaatissaqanngilaq kommunillu tusarniaassummut akissuteqartut allannngortitsinissanut pissutissiinngillat. KNAPK tusarniaanermut akissuteqanngilaq.

TPAK siunnersuuteqarpoq piniakkanik killilersugaasunik agguaassinermut atatillugu piumasaqaataasassasoq qinnuteqaateqartup nammineerluni piniarnermut atortunik peqartarnissaa. Piumasaqaat taanna nalunaarutinut ataasiakkaanut ilanngunneqartarsinnaassaaq. TPAK-ttaaq siunnersuutigaa saniatigooralugu inuussutissarsiteqartut piniarnermut allagartaqartitaanerat atuutilerseqqinneqassasoq, tassa allagartaqartitaasut pingajuattut, § 4-mut nassuiaatit takukkit.

Takornariaqarnermut Immikkoortorta qarfimmit kiisalu Avatangiisinut Pinngortitamullu Pisorta qarfimmit oqaaseqaatit siunnersuummut ilanngunneqartarput siunnersuummi pingaarnernut tunuliaqutaasunullu tamanna naleqquttuugaangat.

Inatsisip allannngortinneqarnissaanut missingiut Inatsileriffimmut inatsisip oqaasertai misissugassanngorlugit suliaritinneqarpoq oqaaseqaataallu ilanngussuunneqarlutik.

II Siunnersuutip aningaasaqarnikkut allaffissornikkullu sunniutissai.

Piniakkanik killilersugaasunik inoqutigiinnut agguaassisarneq pillugu siunnersuut kiisalu najukkani assigiinngitsuni piniakkanik annertunerusumik allaffissornikkut aqutsisoqalernissaa-

nik siunnersuut allaffissornikkut nammagassaqarnerulissasut naatsorsuutigineqarput taamaalil-lutillu kommunit aningaasartuuteqarnerulernerannik kinguneqarsinnaallutik, tassami kommunit ataasiakkaat piniakkanik killilersukkanik inoqutigiinnut imaluunniit aalajangersimasunik ukiu-linnut agguaassisarneq allaffissornikkut aqutarilertussaammassuk.

Namminersornerullutik Oqartussani allaffissornermut tunngatillugu pissutsit taaneqartut marluk aammattaaq ukiuni marlunniit sisamanut sungiussiartuaarnerup nalaani annertunerusumik nakkutilliisoqalernissaanik allaffissornerulernissamillu kinguneqassasut naatsorsuutigineqarpoq, tassami ataatsimut isigalugu maleruagassanik killissarititaasussanillu suliaqartoqartussaammat piviusunngortitsisoqartussaallunilu. Misilittakkatigut nalunngilarput maleruagassat atuutilersin-eqarlaat ingerlaavartumik iluarsartuunneqartarmata, taamaalilluni kommunini Namminersor-nerullutik Oqartussanilu pisariinnerpaamik allaffissortoqarlersinnaaqqullugu.

Aammattaaq *aallaaniarsinnaanermut misilitsittoqartarnissaanik* piumasaqaat aningaasaqarnik-kut allaffissornikkullu annertunerusunik sunniuteqarsinnaavoq, tassa Namminersornerullutik Oqartussat aamma / imaluunniit kommunit akuersissuteqartarnerit allaffissornikkut aqutarissap-patigit. Aallaaniarsinnaanermut misilitsittarneq pillugu allaaserisat paragraffit ataasiakkaat pillugu nassuiaatini takukkit. Maannakkut nutaanik suliarineqartalersussanut aningaasartuutissat amerlassusissaat ilisimaneqanngillat.

III Aalajangersakkanut ataasiakkaanut nassuiaatit.

§ 2-mut.

Imm. 3-mi aamma imm. 4-mi aalajangersakkatigut piniarnermi aallaaniarnermilu pissutsit pillugit siunnersuisarnermut atatillugu piniartut atuisullu ilisimasaasa ilanngunneqartarnissaan-
nut pingaarnerusutigut malitassat aalajangersarneqarput.

Manna tikillugu isumalluutunik iluaquteqarneq pillugu siunnersuisarneq isumalluutit piujuartin-
neqarnissaat kinguaassiornikkullu amerliartortinnissaat tunngavigalugit pisarpoq “...*pisarnertut uumassusilinnik misissuisut siunnersuinerisigut...*”.

Piniartut atuisullu ilisimasaat pillugit imm. 3-mi aamma imm. 4-mi ilanngussinikkut uumassusi-
linnik misissuisut kisimiillutik siunnersuuteqartarunnaassapput, kisiannili ulluinnarni atuisut
sinniisaat, tassa taakku kattuffii, peqataasalissallutik.

Aalajangersagaq taanna pissusiviusunut ullumikkulu KNAPK-mit, KANUKOKA-mit kiisalu
TPAK-mit sinniisut assersuutigalugu piniakkanik killilersugaasunik agguaassisarnermut ima-
luunniit maleruagassaliornernut atatillugu tusarniaavigalugit peqataatillugillu suliarineqartartu-
nut naleqquppoq. Tassa ullumikkut pissusiviusunut inatsisip oqaasertaanik naleqqussaaneruvoq.

Nalunaarutitigut pisariaqalissaaq apeqqut pillugu erseqqissunik maleruagassaliornissaq killissa-

liinissarlu, Kalaallit Nunaanni nunap immikkoortuaniit nunap immikkoortuanut sumiiffimmiit sumiiffimmut ileqqut, ilisimasat atuinerullu assigiinngissinnaanerat innersuussutigalugu. Taamatutaaq uumassusilinnik misissuisunut suliaminnullu tunngatillugu immikkut ilisimasalinnut allanut naleqqiullugu Kalaallit Nunaanni atuisorpassuarniit ilisimasat isummertarnerillu pillugit erseqqissunik assigiinngissuteqartoqarsinnaavoq.

§ 3-mut.

Oqariartaatsit inatsimmi atorpeqartut assigiinngitsunik nassuiarlugit nutaamik paragraffimik ikkussisoqarpoq. Ilaasa qanoq paasineqarnissaannik nassuiarniarnerat ajornartorsiutaasinnaavoq, assersuutigalugu “pissuteqavissumik immikkut isiginninneq”, aamma soq inatsimmut ilanngunneqarsimanersut. Oqariartaatsit aalajangersimasut kisimiillutik allassimappata qanoq paasineqarnissaannik nassuiaanissaq ajornartorsiutaasarsinnaavoq.

§ 4-mut.

Imm. 4-mi oqaasertai iluarsiallanneqarput taamatullu oqaasertai ilanngartungaatsiarneqarlutik. Pissutaasut imatut nassuiarneqassapput:

1998-imi upernaakkut inoqutigiit killiliiviginissaat aamma piniakkat killilersugaasut killiliiviginissaannut killiliussat allat pillugit inatsimmut oqaasertaliussanik naliliinermut atatillugu Naalakkersuisut Inatsisileriffiat akissuteqarpoq “*nunani allani innuttaasut Kalaallit Nunaanni aalajangersimasumik najugaqartut*” danskit naalagaaffianni innuttaasunut Kalaallit Nunaanni aalajangersimasumik najugaqartunut naligiissitaasariaqartut. Tassunga atatillugu Inatsisileriffik imatut allappoq:

“Inatsisileriffiup misissuinermini paasivaa maannakkut inatsimmi atuuttumi § 4, imm. 3 aalajangersakkamik Europami Inuit Piginnaatitaaffii pillugit aalajangersakkami assigiinngisitsinninnissamut akilerliusutut paasisarialimmik imaqartutut isumaqarfiginartog. Aalajangersakkap kingunerissammagu danskit naalagaaffianni innuttaasut Kalaallit Nunaanni najugaqartut tamarmik ataatsimut isigalugu piniarnissamut aallaaniarnissamullu akuerisaasut, nunanili allani naalagaaffimmi innuttaasut Kalaallit Nunaanni ukiuni marlunni ataannartuni najugaqarsimassallutik akuersissuteqarfigineqarsinnaassagunik (piniarnermut allagartamut). Tamanna assigiinngisitsineruvoq pissuteqavissumik immikkut isiginninnissaq innersuussutigalugu illersorneqarsinnaanngitsoq.”

Imm. 6 pillugu; Taamatutaaq inatsisissatut siunnersuummut, UPA 1992/24, nassuiaatini paasineqarpoq soorlu “pissuteqavissumik immikkut isiginninneq” tamatumunnga tunngatillugu itisilerutaasunik nassuiaaserneqarsimanngitsoq. 1992-imimiuna inatsisissatut siunnersuummi siullermeersumik inunnut piniarsinnaatitaasunut annertunerusunik killiliissutissanik ikkussisoqartoq (maannakkut atuuttumi § 4, imm. 3).

1998-imi Inatsisartut upernaakkut ukiakkullu katersuunnerini kiisalu 1998-imi pisuussutit uumassusillit pillugit isumasioqatigiinnermi oqallinnerit innersuussutigalugit apeqqut saqqummiunneqarpoq *kikkut Kalaallit Nunaanni* piniakkanut killilersugaasunut piniarsinnaatitaassanersut.

Tamatumunngattaq atatillugu piniarnermut allagartartaarnissamut piunasaqaataasut ataatsimut isigalugit sukateriffigineqarsinnaanerannik apeqqummik saqqummiussisoqarpoq. Tassaana 1992-imi tunngavissaliisimanninnermik pissuteqartumik aamma siuliini oqallittarnerit innersuussutigalugit “pissuteqavissumik immikkut isiginninneq” oqaasertaliullugu aalajangersakkamik kiisalu qanoq paasinninnissamik nassuiaammik ilanngussisoqartoq. Isumalluutit killeqartut inunnut aalajangersimasunut agguanneqartarnerannut atatillugu “pissuteqavissumik immikkut isiginninneq” ilanngutissallugu tunngavilersuuteqarnermi piniarnermik inuussutissarsiuteqartut kiisalu kulturikkut qasuersaartarnermullu tunngatillugu pisariaqartitat sianiginiarneqarnissaat siunertarerpiarneqarput.

TPAK-p piniarnermut allagartat assigiinngitsut pingasunngortinneqarnissaannik siunnersuutaanut tunngatillugu: 1992-imi Inatsisartut katersuunneranni pingasuniit maannakkutut marlunnut immikkoortitsilluni piniarnermut allagartaqartitseriaatsimut nuuttoqarnissaannut tunngavilersuutigineqarpoq kommunini Namminersornerullutik Oqartussanilu *annertuallaamik* allaffissor-neq, naak piniarnermut allagartat ukiunut tallimakkaarlugit atuutsinneqaraluartut. Piffissap ingerlanerani amerlavallaat taarserneqartarput nakkutigineqanngingjavillutillu. Taamatutaaq akuersissutit kommunimiit kommunimut assigiinngitsorujussuarmik suliarineqartarput, tassa saniatigut inuussutissarsiutigalugu allagartat amerlavallaat tunniunneqartarput taakku tungaanniit annertuumik naammagittaalliuutigineqartartumik.

Allaffissornermi malugineqarsinnaasunik sipaartoqarnissaanik piunasaqaatit innersuussutigalugit piniarnermut allagartaqartitsineramik allanngortitseqqinnikkut sipaartoqarnissaanik piunasaqaataasut naammassineqartussaangillat, taamaassappammi piniarnermut allagartaqartitsineq tamakkerlugu misissuiffigineqartariaqassamat, qarasaasiatigut ingerlatseriaatsit allanngortinneqartariaqassallutik ineriartortinneqartariaqassallutik ilaallu ilanngullugit.

Allaffissornikkut aqutsisoqarfimmi piniarnermut allagartat ukiunut marlunnut pingasunulluunniit atuuttartussat atulersinneqarnissaat sulissutigineqarpoq, tassa maannakkutut ukiumut ataatsimut taarsiullugu piniarnermut allagartat atuuffiata sivitsorneqarneratigut allaffissornermut tunngatillugu aningaasaqarnikkullu iluaqutaasussat anguneqarsinnaaqullugit. Kisitsisitigut paasissutissat nakkutilliinerlu eqqarsaatigalugit pisanik nalunaarutiginnitarneq ukiut tamaasa pisassaaq.

§ 5-imut.

Inatsimmi atuuttumi § 4, imm. 4 pisoqaq peerneqarpoq; *“Ilisimatusarnikkut siunertanut Naalakkersuisut imm. 3-p atortinneqannginnissaanut immikkut akuersissuteqarsinnaapput.”* inatsimmi § 7 innersuussutigalugu, tassami ilisimatusarnikkut misissuinissanut inatsisikkut tunngavissaqareemat.

§ 6-imut.

§ 6, imm. 1, nr. 4-mi aamma nr. 6-imi aalajangersakkatigut 1998-imi upernaakkut ukiakkullu katersuunnerni Inatsisartut aalisarnermut, piniarnermut nunalerinermullu ataatsimiititaliaata siunnersuutai sianiginiarneqarput. § 6-imi pingaarnertut oqaatigineqarpoq *“Naalakkersuisut piniarnerup aallaaniarnerullu malittarisassatigut aqunneqarnerat pillugu iliuuseqarsinnaapput, taamatutaaq makku pillugit malittarisassiorsinnaallutik: assersuutigalugu § 6, imm. 1, nr. 4-mut aamma nr. 6-imut inoqutigiit pillugit killiliussanik siunnersuut.*

Tamanna isumaqarpoq nalunaarutini assigiinngitsuni inoqutigiit pillugit killiliussassanik atuinissaq pillugu maleruagassanik aalajangersaasoqarsinnaasoq.

1997-imi 1998-imilu tusarniaanernut atatillugu kommunit arlallit piniakkanik killilersukkanik agguaassisarnermut atatillugu inoqutigiit pillugit killiliussassanik atuinissartik kissaatiginngilaat aaqqissuussinerup taamaattup allaffissornikkut nammagassartariumaagai innersuussutigalugit.

Inoqutigiit qanoq paasineqarnissaannut tunngatillugu taanna piniakkat ataasiakkaat pillugit nalunaarutini tamatumunnga tunngasuni imaluunniit kommunini ataasiakkaani najukkani pissutsinik aamma inunnik nalunaarsuiffimmik naammassisinnaasaannik pitsaassusiinillu pitsaaneruumik ilisimasalinni Inatsisileriffiup siunnersuuteqarneratut erseqqinnerusumik nassuiaaserneqartassaaq.

Inoqutigiit pillugit killiliussat atorneqarnissaannut periarfissat pillugit aalajangersagaq taamaallilluni piniarneq aallaaniarnerlu pillugit inatsimmi inatsisitigut tunngavissalerneqassaaq, siornatigummi taamaanngikkaluarmat.

Paragraffimi tassani (§ 6, imm. 1, nr. 4) aalajangersakkamik ikkussisoqarsimavoq *“Naalakkersuisut piniarnerup aallaaniarnerullu malittarisassatigut aqunneqarnerat pillugu iliuuseqarsinnaapput taamatutaaq pisarineqarsinnaatitaasunik piniakkanut aalajangersimasunut pisassiisutitut aalajangersaallutik agguaassisinnallutik”* inuit ukiui malillugit.

Tamatumunnga atatillugu Inatsisartut katersuunnerinit aamma pisuussutit uumassusillit pillugit isumasioqatigiittunit inuit, piniarnermut allagartartaarsinnaatitaasut aamma/imaluunniit piniakkanut killilersugaasunut akuersissuteqarfigineqarsinnaatitaasut, ukiuisa qaffanneqarnissaannik siunnersuutit eqqaasitsissutigineqassapput.

Taamatut aalajangersagaqalernikkut assersuutigalugu tuttunniarnissamut umimmanniarnissamulluunniit akuersissuteqarfigineqarumalluni qinnuteqaammi aalajangersimasunik ukioqarnisamik piumasagaammik ilanngussisoqarsinnaavoq.

Inuit qinnuteqarsinnaasut taamaalillutillu piniakkanut killilersukkanut akuerineqarsinnaasut ukiuisa qaffanneqarsinnaanerannik nalunaarutini ataasiakkaani aalajangersaasoqarsinnaavoq, piniakkat killilersugaatillugit imaluunniit arlaatigut malittarisassaqaqtitsinikkut aqutaatillugit, assersuutigalugu tutut, umimmaat, nannut, aarrit kiisalu qilalukkat qaqtat qernertallu.

§ 6, imm. 1, nr. 7)-imi aallaasit imassaat aalajangersimasut atoqqusaannginnissaannut inatsisikkut tunngavissaliisoqarpoq siunertarineqarluni piniakkat toqunneqartarnerini aallaasit imassaat sunniuteqapallannerpaasartut atorneqartussaataitanerat pillugu maleruagassaliortoqarnissaanut periarfissiinissaq.

Piniartut aalisartullu taamatullu allaffissornermik suliaqartut akornanni nalinginnaasumik ilisimaneqarpoq Kalaallit Nunaanni aallaasit imassaannik tuniniaasoqartartoq piniakkanut toqutsissutigiguassallugit naleqqutinngitsunik.

§ 6, imm. 3-mut tunngatillugu erseqqinnerusumik aalajangersaasoqarpoq, tassani Naalackersuisut piniakkat pillugit nalunaarutini ataasiakkaani erseqqinnerusunik malitassaliorsinnaallutik piniakkanik ataatsiakkaanik kommunit annertunerusunik ingerlatsinissaannut periarfissillugit, Naalackersuisut killiliussaasa iluanni. Kommunit ataasiakkaat imaluunniit kommunit sanileriit taamaalillutik tamakku pillugit kommunini ileqqoreqqusaliorsinnaapput.

Assersuutigalugu kommunit sanileriit marluk akornanni tututassiissutit umimmattassiissutillu agguaanneqarnissaat aamma nunat piffissallu piniarfiusussat agguaanneqarnissaat tamatumani pineqarsinnaapput. Taamatuttaaq iliuitsit taamaattut piniarsinnaanermut aallaaniarsinnaanermullu piumasagaatit sukaterneqarnerinik, piujuartitsinissaq siunertaralugu teknikikkut iluarsartuussinernik kiisalu iluaqutiginninnermik il.il. imaqarsinnaapput, § 6, imm. 1 takuuk.

Kiisalu imm. 6-imi aalajangersakkamik ikkussisoqarpoq imaalillugu Naalackersuisut piniarnermut allagartartaarnermut atatillugu *aallaaniarsinnaanermut misilitsittoqartarnissaanik piumasagaateqarnissaq* pillugu maleruagassiorsinnaallutik. Piniakkat sorliit aallaaniarsinnaanermut misilitsiffiusartussatut piumasagaatitaqassanersut piniakkat pillugit aalajangersakkani ataasiakkaani Piniarneq pillugu Siunnersuisoqatigiit Naalackersuisunut inassuteqaateqareernerisigut aalajangersaasoqartassaaq.

Aalajangersagaq taanna ilanngunneqarpoq naalackersuisunngortut suleqatigiinnissamut isumaqatigiissutaasa ilaattut. Oqaatigineqassarli allaffissornikkut aqutsisoqarfik ukioq manna tullianiluunniit nutaanik sulissuteqarnissamut piareersinnaanngimmat. Aallaaniarsinnaanermut

misilitsittarnissamik suliaq naalagaaffimmi oqartussaasunut ataqatigiissaarneqartariaqassaaq, taakkumi sakkunik pigisaqarnissamut akuersissuteqartarnej suliaasaqarfigalugu oqartussaaffigimmasuk. Nutaamik suliniutigineqarnissaat piviusorsiortumik piffissalerlugu aallararteriartit-tariaqarpoq sivikinnerpaamik ukiuni tallimani misiligummik ingerlateqqaarlugu.

Kalaallit Nunaanni sakkut pillugit inatsit 1992-imeersoq naapertorlugu (Naalagaaffimmi oqartussaasut suliaasaqarfiat) sakkunut erseqqinnerusumik taaneqartunut sakkunik pigisaqarnissamut akuersissuteqartoqarsimanissaanik piunasaqaateqarpoq, sakkumut ataatsimut 840,00 kr.-nik atuinissamut akiliuteqartoqartarluni kingornatigullu sakkunik pigisaqarnissamut akuersissutitutulliuttunut affarmik akeqartitsisoqartarluni.

§ 9-mut.

Imm. 3-mi immikkoortoq kingulleq annikinnerusumik ilaneqarpoq erseqqissarniarlugu sumi erseqqinnerusumik nassuiaasoqarsinnaanersoq.

§ 12-imut.

Oqaasertai annikinnerusutigut iluarsivigineqarput, suliaasaqarfiit allanngortinneqarnerannut tunngasuullutik. Imm. 2-missaaq piniarnermi aallaaniarnermilu pissutsit pillugit siunnersuisarnermi piniartut atuisullu ilisimasaasa ilanngunneqartarnissaat pillugu allannguutissanut siunnersuutit eqqaamaniarneqarput.